

**FRAMKVÆMDARÁKVÖRÐUN FRAMKVÆMDASTJÓRNARINNAR  
(ESB) 2015/266****2015/EES/63/15****frá 16. febrúar 2015****um að viðurkenna Mön sem lausa við varróaveiki og um breytingu á viðaukanum við  
framkvæmdarákvörðun 2013/503/ESB***(tilkynnt með númeri C(2015) 715) (\*)*

FRAMKVÆMDASTJÓRN EVRÓPUSAMBANDSINS HEFUR,

með hliðsjón af sáttmálanum um starfshætti Evrópusambandsins,

með hliðsjón af tilskipun ráðsins 92/65/EBE frá 13. júlí 1992 um dýraheilbrigðiskröfur varðandi viðskipti innan Bandalagsins og innflutning til Bandalagsins á dýrum, sæði, eggfrumum og fósturvísu sem dýraheilbrigðiskröfur í sérreglum Bandalagsins er um getur í I. hluta viðauka A við tilskipun 90/425/EBE gilda ekki um <sup>(1)</sup>, einkum 2. mgr. 15. gr.,

*og að teknu tilliti til eftirfarandi:*

- 1) Í tilskipun 92/65/EBE er mælt fyrir um dýraheilbrigðiskröfur sem gilda um viðskipti innan Evrópusambandsins og innflutning þangað á dýrum, sæði, eggfrumum og fósturvísu sem dýraheilbrigðiskröfur í sértækum gerðum Evrópusambandsins, sem um getur í viðauka F við þá tilskipun, gilda ekki um.
- 2) Varróaveiki í býflugum er á skrá í viðauka B við tilskipun 92/65/EBE með eldra heiti sínu „*varroasis*“. Henni valda útsníklar, mitlar af ættkvíslinni *Varroa*, og hefur verið tilkynnt um hana um allan heim.
- 3) Í 15. gr. tilskipunar 92/65/EBE er kveðið á um að ef aðildarríki telur að yfirráðasvæði þess eða hluti af yfirráðasvæði þess sé laus við einn eða fleiri þeirra sjúkdóma sem eru skráðir í viðauka B við tilskipunina eigi það að leggja fyrir framkvæmdastjórnina viðeigandi gögn, sem eiga að liggja til grundvallar samþykkt á ákvörðun.
- 4) Varróaveiki breiðist út með flutningi á ungvíði býflugna og beinni snertingu milli smitaðra fullvaxinna býflugna. Það síðarnefnda er einungis mögulegt innan flugsvæðis býflugunnar. Af þessum sökum fá yfirráðasvæði einungis viðurkenningu á að þau séu sjúkdómslaus ef hægt er að stýra flutningi á býflugnabúum og ungvíði og ef þau eru nógu einangruð landfræðilega til að koma í veg fyrir að utanaðkomandi býflugur fari inn á þau. Auk þess verða lögðar yfirvöld að sanna með niðurstöðum úr langtímaöktunum að svæðið sé í raun laust við varróaveiki og að þeirri stöðu sé viðhaldið með ströngu eftirliti með aðflutningi lifandi býflugna og ungvíðis.
- 5) Með samþykkt framkvæmdarákvörðunar framkvæmdastjórnarinnar 2013/503/ESB <sup>(2)</sup> voru Álandseyjar í Finnlandi viðurkenndar sem svæði sem er laust við varróaveiki.
- 6) Bretland hefur farið fram á það við framkvæmdastjórnina að yfirráðasvæði Manar verði viðurkennt sem laust við varróaveiki.
- 7) Mön hefur tiltekin takmörkuð tengsl við Sambandið þó að hún sé, sem hjálenda Bresku krúnunnar með sjálfstjórn í innri málefnum, ekki hluti Sambandsins. Af þessum sökum er kveðið á um í reglugerð ráðsins (EBE) nr. 706/73 <sup>(3)</sup> að Bretland og Mön skuli meðhöndluð sem eitt aðildarríki við beitingu reglna sem varða m.a. dýraheilbrigðislöggjöf.
- 8) Varróaveiki er tilkynningarskyldur sjúkdómur á Mön og hvorki má flytja býflugur á neinu stigi lífsferils þeirra né notaðar býkúpur, býflugnakörfur (e. *skep*) eða hvers kyns ílát til að hýsa býflugur frá meginlandi Bretlands til Manar. Að auki er Mön eyja sem er staðsett á Írlandshafi langt utan flugsvæðis býflugna og er því landfræðilega séð nægilega aðskilin svæðum sem geta verið sýkt af varróaveiki.

(\*) Þessi ESB-gerð birtist í Stjtið. ESB L 45, 19.2.2015, bls. 16. Hennar var getið í ákvörðun sameiginlegu EES-nefndarinnar nr. 77/2015 frá 30. apríl 2015 um breytingu á I. viðauka (Heilbrigði dýra og plantna) við EES-samninginn, biður birtingar.

(1) Stjtið. EB L 268, 14.9.1992, bls. 54.

(2) Framkvæmdarákvörðun framkvæmdastjórnarinnar 2013/503/ESB frá 11. október 2013 um að viðurkenna hluta Sambandsins sem lausa við varróaveiki í býflugum og um viðbótarábyrgðir sem krafist er vegna viðskipta innan Sambandsins og innflutnings til að vernda sjúkdómslausa stöðu þeirra að því er varðar varróaveiki (Stjtið. ESB L 273, 15.10.2013, bls. 38).

(3) Reglugerð ráðsins (EBE) nr. 706/73 frá 12. mars 1973 um Bandalagsákvæði sem gilda um Ermarsundseyjar og Mön og varða viðskipti með landbúnaðarafurðir (Stjtið EB L 68, 15.3.1973, bls. 1).

- 9) Bretland hefur, í samræmi við 1. mgr. 15. gr. tilskipunar 92/65/EBE, lagt gögn fyrir framkvæmdastjórnina þar sem greint er ítarlega frá eftirlitsráðstöfunum sem hefur verið beitt í nokkur ár vegna býflugnastofna á Mön og fyrirkomulagi til að sannreyna að varróaveira sé ekki til staðar í þeim stofnum.
- 10) Í kjölfar mats á gögnum sem Bretland lagði fram má líta svo á að Mön sé yfirráðasvæði Bretlands sem er laust við varróaveiki.
- 11) Því ætti að skilgreina viðbótarábyrgðirnar, sem krafist er við viðskipti, með hliðsjón af þeim ráðstöfunum sem þegar er kveðið á um í löggjöf Manar.
- 12) Því ætti að breyta viðaukanum við framkvæmdarákvörðun 2013/503/ESB til samræmis við það.
- 13) Ráðstafanirnar, sem kveðið er á um í þessari ákvörðun, eru í samræmi við álit fastanefndarinnar um plöntur, dýr, matvæli og fóður.

SAMÞYKKT ÁKVÖRÐUN ÞESSA:

*1. gr.*

Í stað viðaukans við ákvörðun 2013/503/EB kemur viðaukinn við þessa ákvörðun.

*2. gr.*

Ákvörðun þessari er beint til aðildarríkjanna.

Gjört í Brussel 16. febrúar 2015.

*Fyrir hönd framkvæmdastjórnarinnar,*

Vytenis ANDRIUKAITIS

*framkvæmdastjóri.*

## VIÐAUKI

## „VIÐAUKI

## Aðildarríki eða yfirráðasvæði þeirra sem eru viðurkennd sem laus við varróaveiki

1	2	3	4	5
ISO-kóði	Aðildarríki	Yfirráðasvæði sem er viðurkennt sem laust við varróaveiki	Kóði í TRACES-kerfinu Staðbundin dýralæknaeining	Vörur sem er bannað að flytja inn á yfirráðasvæði sem er skráð í þriðja dálk
FI	Finnland	Álandseyjar	FI00300 AHVENANMAAN VALTIONVIRASTO	Ungviði í lokuðum hölfum og klaktar, fullvaxnar, lifandi býflugur
UK	Bretland	Mön	GB06301 MÖN	Býflugur á öllum stigum lífsferils þeirra, notaðar býkúpur, býflugnakörfur eða hvers kyns ílát til að hýsa býflugur“